

Edizioni

- letto 554 volte

Wallensköld

I.

L'autrier par la matinee
entre un bois et un vergier
une pastore ai trouvee
chantant por soi envoisier,
et disoit un son premier:
- Ci me tient li maus d'amor. -
tantost cele part m'en tor
que je l'oï desresnier,
si li dis sanz delaier:
- Bele, Deus vos dont bon jor! -

II.

Mon salu sanz demoree
me rendi et sanz targier.
Mult ert fresche et coloree,
si m'i plot a acointier:
- Bele, vostre amor vous qier,
s'avroiz de moi riche ator. -
Ele respont: - Tricheor
sont mès trop li chevalier.
Melz aim Perrin, mon bergier,
que riche honme menteor.

III.

- Bele, ce ne dites mie;
chevalier sont trop vaillant.
Qui set donc avoir amie
ne servir a son talent
fors chevalier et tel gent?
Mès l'amor d'un bergeron
certes ne vaut un bouton.
Partez vos en a itant
et m'amez; je vous creant:
de moi avrez riche don. -

IV.

- Sire, par sainte Marie,
vous en parlez por noient.
Mainte dame avront trichie
cil chevalier soudoiant.
Trop sont faus et mal pensant,
pis valent de Guenelon.
Je m'en revois en meson,
que Perrinez, qui m'atent,
m'aime de cuer loiaument.
Abessiez vostre reson! -

V.

G'entendi bien la bergiere,
qu'ele me veut eschaper.
Mult li fis longue proiere,
mès n'i poi riens conquerer.
Lors la pris a acoler,
et ele gete un haut cri:
- Perrinet, traï, traï! -
Du bois prenent a huper;
je la lais sanz demorer,
seur mon cheval m'en parti.

VI.

Quant de m'en vit aler,
si me dist par ranposner:
- Chevalier sont trop hardi! -

- letto 433 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-432>